



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 10



**Bank nung inyakertem tejangraba
kümzüka toktsütsü: Finance minister**



**Billie Jean King Cup World Group
Play-offs nung Sania asayatsü**

VOL. XVIII NO. 152 (ADOK 152) DIMAPUR

RASEMNÜ (WEDNESDAY)

METSÜREMI (MARCH) 17, 2021

₹ 5.00

COVID-19 Nagaland: Anogo asembuba kasa dang süiogo

Kohima, March 16 (TYO): Tanü agi anogo asembuba Nagaland nung COVID-19 puteter mesüra taneptsü angur maliasü.

"Mongulbarnü nisung shinga dak COVID-19 meputet aser taneptsü angur-a maliasü" ta Health & Family Welfare Minister, S Pangnyu Phom-i ashi.

Nisung 12,255 rongnungi 11,966 taneptsü nguogo aser tang 14 anepaludar, ta paisa ashi.

"Nagaland nung COVID-19 nungi taneptsü angurji 97.6% lir. Nisung 91 asüba nungi 10 bo

tanga timtem ajanga asü. Nisung 154 tanga state temi ogo" ta Health & Family Welfare Director, Dr Denis Hangsing-i metetdaksü.

Tang anepalur nisung 14 rongnung Kohima nung 13 aser Mokokchung nung ka lir ta paisa ashi.

"Nagaland nung COVID-19 alitsü akok ta temolung melemi bilemba sample 1,33,241 tendangogo. RT-PCR ajanga 75,271, TrueNat ajanga 37,481 aser Rapid Antigen Test ajanga 21,489 tendang" ta Dr Hangsing-isa metetdaksü.

MHA-i NSCN (K) telok noktanger

Dimapur, March 16 (TYO): Ministry of Home Affairs-i National Socialist Council of Nagaland (Khaplang) noktangba osang metetdaksüogo.

NSCN(K)-i Indo-Myanmar tesem nung Naga nunger aliba tesemtem dena Nagaland balaka kümteptsü alizüng lir. Parnoki Nagaland aser North Eastern Region nung tanga telungpurtem den tesentaktep yanglur India nungi balaka pilaa aotsü meranger, ta MHA sangdong ka nung ashi.

NSCN (K)-i India, Nagaland, Manipur aser Arunachal sorkartem anema ozüngi memelaba mapa inyaker aser parnoki United Liberation Front of Asom (ULFA), Manipur nung Meitei teloktem den

tesentaktep lir, ta MHA-isa metetdaksü.

NSCN (K)-i sen atema shishilembartem, sorkar mapa inyakerter aser civilian pur aoe aser züngsem tasentem maneni anioker. Parnoki international borders adena teseptem amenoker aser India anemer dang nungi prangpong-injangtem den tanga teyari agir, ta MHA-isa ashi.

September 28, 2015 nungi tenzüker NSCN (K)-i ozüng alema mapa 104 inyangdang security forces personnel 7 aser civilian 6 tepset. Parnokisa civilian 75 pur ao. Anungji NSCN (K)-i ozüng alema inyakba mapa aziüoktsü atema 'unlawful association' ta sangoktsür, ta MHA-isa metetdaksü.

Bank tem sülen Insurance company temi lungkak aittsü

New Delhi, March 16 (Agencies): India nung anogo ananü bang nung mapa inyakerter lungkak aitba sülen ano public sector general insurance company temi lungkak aittsü osang metetdaksüogo.

Hombas aser Mongulbar anogotem lungkak aitba sülen public sector general insurance company tem aser Life Insurance Corporation of India (LIC)-i Bodbar aser Brihostibar (March 17 & 18) lungkak aittsü ayongzükogo.

Centre sorkari general insurance company ka privatize asütsü telemteba agiba anema parnoki lungkak aittsü.

"Sorkari FDI limit 74% ajungkettsü, company ka privatize asütsü, company pezü lokteptsü aser wage revision yakta tembangtsü telemteba agiba anema general insurance sector nung union ajaki lungkak aittsü lemtetogo" ta General Insurance All India Employees' Association

(GIEAIA) General Secretary, K. Govindan-i ashi.

"Onoki pension system tasenba agiener pension system tejenba amshitsü atema takhangba agütsür" ta Standing Committee (General Insurance), All India Employees' Association (AIIEA) Secretary, Sanjay Jha-ia ashi.

PSU non-life insurance company temji National Insurance Company Ltd, The New India Assurance Company Ltd, The Oriental Insurance Company Ltd aser United India Insurance Company Ltd lir.

Company pezü indang kongsang 7,500 tema lir aser mapa inyaker 60,000 tema lir, ta Govindan-isa metetdaksü.

Anogo ananü linük nung bank nung mapa inyakerter lungkak aitba ajanga nübortemi timtem kanga ajuruogo. Ajisiüka, ICICI Bank, HDFC Bank aser Axis Bank kongsangtembo iba lungkak aitba nung maden.

April 17 nü 51-Noksen A/C by-election agitsü

Kohima, March 16 (TYO): Tuensang district kübok 51-Noksen Assembly Constituency nung April 17, 2021 nü by-election agitsü.

"Andhra Pradesh aser Karnataka nung Parliamentary Constituency ana aser Nagaland dena state balala nung Assembly Constituency 14 nung by-election agitsü telemteba agiogo" ta Election Commission of India (ECI) Under Secretary Sanjeev Kumar Prasad-i metetdaksü.

March 23 nü gazette notification sangdongtsü aser March 30 tashi nung nomination asütsüla, ta ECI-i ashi.

March 31 nü nomination reprangtsü aser candidate temi tenüng meyipa agiba anogo tatembangbaji April 3 asütsü ta parnokisa metetdaksüogo.

April 17 nü polling asütsü aser May 2 nü votes azüngtsü, ta ECI Under Secretary-isa ashi.

ECI-i by-election nung EVMs aser VVPATs amshitsü lemtetogo aser nüngdakba ama EVMs o VVPATs renemogo, ta paisa shisem.

By-election agitsü aliba district mesüra Assembly Constituency nung model code of conduct (MCC) tenzüko. MCC kübok candidate tem, political party tem aser State o Union sorkartem dena lir, ta Sanjeev Kumar Prasad-isa metetdaksü.

ECI-i Photo Voter Slip melena Voter Information Slip (VIS) amshitsü telemteba agiogo. VIS nung polling station, anogo, mapang amala alitsü saka noksabo madentsü. District Election Officer-i VIS ji polling

asütsü anogo pungu tejakdang alemtsü, ta paisa ashi.

Ajisiüka, VIS ji voter temindang proof of identity ama amshitsü memelatsü kechiyong February 28, 2019 nungi ECI-i identity proof ama Photo Voter Slips mamshitsü noktangogo, ta ECI Under Secretary-isa metetdaksü.

COVID-19 wara ajanga ECI-i August 21, 2020 nü tetuyuba kar agütsüogo aser ibaji tang agitsü aliba election nunga beshitsü, ta paisa shisem.

Naga Hospital Authority Kohima (NHAK) nung COVID-19 atema anepaluba mapang October 12, 2020 nü Environment, Forest & Climate Change and Justice & Law Minister, C M Chang asü aser iba ajanga 51-Noksen menden tazüng aküm.

Mar 22 nungi Nagaland nung Class 1 nungi 5 tashi lapoktsü

Kohima, March 16 (TYO): March 22, 2021 nungi Nagaland nung class 1 nungi 5 tashi school lapoktsü.

Mongulbarnü Principal Secretary (Home) Abhijit Sinha-i iba atema Standard Operating Procedure (SOP) metetdaksüogo.

COVID-19 wara ajanga Nagaland nung March 2020 nungi school tem shibangtsüsa aküm.

COVID-19 nungi jenbua alitsü atema teinyaktsütem latettsüogo. Iba SOP ya tesayurtem, school nung mapa inyakerter aser kaketsür ajaki beshitsü, ta Abhijit Sinha-i ashi.

SOP

- * Nisung o nisung tsüngda feet 6 tepila ayutsü.
- * Ajaki face covers / masks

enoktsüla.

- * Mapang shia sapon agi teka metsüktsü. Teka memenen yonga sapon agi second 40-60 shi metsüktsüla.

- * Alcohol aliba hand sanitizers amshitsü.

- * Tango sashiba yimya sülen anidaktsüla. Iba nung aketdang/hajidang tissue/ handkerchief/tekettsü agi tebang aser teni nembangtsü dena lir.

- * Metzü memetsüshitsü.
- * Aarogya Setu App amshitsü.

School ajak nung Class 1 nungi 5 tashi tsünglanglen agüja aliba inyaktsüla:

- * Class shia chairs, desks tsüngda feet 6 tepila ayutsü.
- * School temi class tem asoshi anogo balala routine

yanglutsü.

- * Class shia nung kaketsür aliba ama aser class room asadangba sülen routine yanglutsü.

- * Supplementary Online / distance learning maneni inyaktsü.

March 17, 2021 nungi Nagaland nung class 6 ser temapurtem asoshi residential schools, hostels, guest houses aser paying guest lapoktsü telemteba agiogo.

Sorkari mapang shia tetuyuba agütsüba sülen anidaka hostels lapoktsü melar, ta Directorate of School Education-i tanü metetdaksü.

Nagaland nung February 8, 2021 nungi class 6 aser temaba class tem lapoktsü temelaba agütsü.

NSCN (IM)-i Nagaland Congress aitsür

Dimapur, March 16 (TYO): Nagaland Pradesh Congress Committee (NPCC)-i Framework Agreement meyipsar ta Mongulbarnü NSCN (IM)-i tai tongloktsüogo.

Nagaland Congress lennirtemi parnoki bilemba ama inyaktsü atema Framework Agreement meyipsar ta Ministry of Information and Publicity sangdong ka nung ashi.

Framework Agreement nung Naga nunger yimten maittsü kanga junga lateta lir. Putiotsü nung aibelenbatem- 9-Point Agreement, 16-Point Agreement aser Shillong Accord ji Naga yimten latettsü atema masü saka Naga nunger shilem ka takar akümtsü atema dang liasü. Item nisungtemi tanü tashi India

sorkar nungi security aser maongka peria ngudar, ta MIP-isa metetdaksü.

Naga Congress lennirtemi putiotsü nungi angazüktsü memolunger aser maneni Framework Agreement nung yimten onük lateta aliba magizüker. Framework Agreement nung Naga nunger ta aliba ama mesüi Nagaland state nung alirtem atema dang parnoki telemteba aginüba sayur, ta MIP sangdong nungsa shia lir.

"Onoki iba tangatetba khenyongi magizüker kechiyong iba ajanga Jawaharlal Nehru-i Naga nunger yimten temeten ajembangba sayur" ta parnokisa ashi.

"Nehru kübok Congress sorkar mapang nungi Naga

nunger reshikangshitsü tenzüker aser parnoki Nagaland atsünga agitsü atema Indian security forces meyirjang aika yok" ta MIP-isa metetdaksü.

Indo-Naga putiotsü ya lapoka aliba kaketsü ka ama lir aser nisung ajaki idakji aliba züngtettsü akok. Naga nunger tesamaba kin ka mekümdaktsütsü. Iba mapa ya küm aika tejakdang tenzüker aser tom nung manendaktsütsü, ta parnokisa ashi.

India sorkari o melenshiaka NSCN-i Naga yimten latettsü atema Framework Agreement nung dang noktaksü, ta MIP-isa ashi.

NPCC-i Nagaland state nung Naga nunger atema dang yimten latetnür, ta MIP-isa tai tongloktsü.

IMPUR BAPTIST AROGO QUASQUICENTENARY AMONGER

Impur Baptist Arogo American Missionarytem lenisüba nung 1896 küm tenzüker liyonga aruba taküm, 2021 küm 125 ajunger. Küm 125 tashi Tsüngremer taochi nung anir aruba tenüngsang benjungmong, Quasquicentenary March 20 - 21, 2021 Impur nung amongtsü sentong renema lir. Iba sentong nung atentsü asoshi Impur temeket Ao Arogotem nungi jaoka lir aser talisa Impur nung lir aor tenzükerterem, chirnurtem aser semchisemnurtem ajak arua atentsü pelashishia jaoker. Anungji nenok mazüngi liaka mapang agütsüteta arua sentong nung atentsü iba sangdong ajanga nenok nem metetdaksür. Iba tenüngsang Jubilee mong Tsüngrem sentsüwangshi asoshi südakjang ta ajaki sarasadema atadi.

**Sd/-
Rev. Dr. Mar Atsongchanger
Convenor
QQC Planning Committee**

**Sd/-
Rev. R. Teka
Pastor
Impur Baptist Arogo**

Directorate of School Education ajanga metetdaksür

Dimapur, Metsüremi/March 16 (TYO): Directorate of School Education (DSE) Nagaland, Kohima kübok training magi Hindi tesayur inyaka alir shirnoksa September 2001 sülen appoint süa ali, parnok ajak Central Institute of Hindi, Agra ajanga agiba Hindi ShikshanNishnat, Hindi ShikshanParagat, Hindi Shikshan Praveen (Academic session 2021-23) aser CIH, Dimapur Centre nung agiba VisheshGahan (Academic session 2021-22) full term training courses agitsü metetdaksür, ta Directorate

of School Education ajanga sangdong ka nung ashi. Iba dak sendakba nung training aginüa aliba untrained Hindi Teacher tem dang Institutes Website: www.khsindia.org nung online application tem 01-03-21 nungi 31-03-21 tsüngta agütsütsü mepishir, ta sangdong ajanga ashi. Online application agütsüba mapang timtem kar adokra, applicant temi email ajanga khs@gmail.com den tongteprateptsü akok. Website nung shia aliba ama pei inyadkak controlling officer nungi No Objection Certificate (NOC) den bank/

demand Draft ya March 31, 2021 tashinung agütsütsüla. **Iba training atema admission agir asoshi item conditions ya amshitsü akok:** (1) Training agiba tepiyong shimteta aliba candidate temi substitute ayutsüla. (2) Mashisa aliba tetsür aser aneptsü makokba tashidak agi shirangba nisungtem nem admission magütsütsü. Admission agiba sülen iba ama timtem adokra, item indang admission thitsütsü aser pai/lai Sansthan nungi stipend sen ngua aliba meyipa agütsütsüla.

Principal, Headmaster & Head Teacher tem orientation sentong agi



Kohima district atema Ayushman Bharat kübok School Health & Wellness Programme ka Principals, Headmaster aser Head Teacher tem nem katsüba mapang Shanavas C, IAS, Principal Director, School Education, Nagaland ajanga iba sentong nung jembidang tangokba noksa nung angur. Lasa noksa nung pa sülen Dr. Khriesilie Sachü, Nodal Officer, School Health Programme (SHP), DoHFW, Nagaland angur.

Dimapur Police-i ozüing raksartem apu

Dimapur, Metsüremi/March 16 (TYO): FGN tenüing nung 4th Mile area nung shishilempar dang nungi ozüing alema tashiyim agi senotsü sarua aliba mapang Dimapur Police-i March 15, 2021 nü arishi küm 34 tain Kughato Swu aser arishi küm 35 tain Inaka Achumi na apu. Tena ket nungi sen 2,000 den mobile handset ana nguteta liasü. Iba maparen dak sendakba nung ken o ka Diphupar Police Station, Dimapur nung zülüokogo.

Alto B/Reg No. NL01P5847 nung ozüing alema Indian Made Foreign Liquor (IMFL) belenba mechi Dimapur Police ajanga March 16, 2021 nü arishi küm 31 tain Dilip Basumatary apu. Iba mapang pa ket nungi IMFL cases 17 nguteta liasü. Iba dak sendakba nung ken o Chumoukedima Police Station nung benoka lir, ta sangdong ka ajanga ashi. March 13, 2021 nü Dimapur Police aser 5 Assam Rifles temi truck anishir ka

aser private transport agency ka nung inyaker ka Thilixu village area nungi kumzüka liasü. Tena ya mejangjaba nisungtemi Purana Bazar area, Dimapur nungi tashiyim agi pua bener oa liasü. Iba maparen dak sendakba nung ken o ka Diphupar Police Station nung zülüoka lir. Maneni Dimapur Police temi inter-state check gate tem nung anepdang 5:00 ako nungi 8:00 ako tashi Mobile armed escort agütsür, ta sangdong ajangasa ashi.

NHGS pur 12th General Session menogo



Dimapur, Metsüremi/March 16 (TYO): Nagaland Home Guards Service Association (NHGS) pur 12th General Session ya Central Training Institute, Toluvi, Dimapur nung March 16, 2021 nü agiogo. Iba sentong nung Commandant General, Home Guards, Civil Defence and State Disaster Response Force, L. Bendang Lemtur, IPS ya alakteta jaoker ama arua dena liasü. Iba senden lapokba mapang

alakteta jaokeri Officer tem dang pei kübok alirtem nem molunglem kadaktsütsü ajungshi. Paisa kin telemsa madoki alitsü züngsemtem ayongzüük aser Uniform service nung kin telemsa nungdak maka, ta ashi. Paisa Nagaland Home Guards Service Association indang constitution Adok 2 buba sayaja liasü. Tanabuba senden nung Association dak sendakba tongtipang onüktem benoka

jembi. Association inyakyim tali tashi itsütsü atema sanen luden züngsem tasen ana shimoksema liasü. Deputy Commandant General, Home Guards, Civil Defence and SDRF Medozhalie Pienyu-i lokti senden takok ngua agitetba atema tenüingsang agütsü aser züngsemtem dang pei mapa shidak inyaksü aser nüma danga Department tejakleni anir aotsü ayongzüka liasü.

Dimapur, Metsüremi/March 16 (TYO): Ayushman Bharat kübok School Health & Wellness Programme nung Principals, Headmasters aser Head Teachers tem atema orientation program ka Kohima district atema SIEMAT Hall, SCERT, Kohima nung March 16, 2021 nü tenzüokogo. Iba Orientation sentong ya metenzükdang Shanavas C. IAS, Principal Director, School Education ya tongti tesemdanger ka ama inaugural session tatsüka agia liasü. Iba sentong nung shilem agirtem den jembiba mapang, Shanavas-i iba ama sentong ayongzüketba nung temolung süa bilemba indang ashi, koba mapang talangka nungi yongya ataba sentong ka saka COVID-19 tashidak wara mechi taoba küm magitet. Tang tendak kaketshirtem indang Health & Wellness asadanga jembiba mapang, kaketshirtemi menatepba aser memenatepba tashidak indang jembi aser ano kaketshirtem asoshi Mental Health ya tongtibangtiba lir, ta ashi. Paisa school nung counseling ya kanga tongtipang lir, ta ashi, kechiaser kaketshirtem ya jenjang balala aliba kibongtem nungi lir asünung tajangshiba balala ajurur. Pai kaketshirtem rongnung temesepba chiyongtsü amshiba aser parnok temang aintsü atema chiyongtsütem aser sexual health indang süoki ia agizütsü nungdaker, kechiaser parnok ya arishi küm nung

kanga tongtipang zünga ka lir, ta ashi. Iba ama sentongtem ya state mesüra district level kisüing nung masü saka block/yimtsüing level tashinung agitsü nungdaka lir, ta Shanavas-i ashi. Pai sentong nung adener dang tatishitsü tajung akaba nübu kaka asütsü ayongzüük, kechiaser kaketshirtemi lenmang aisü nung tesayur jilu angazüka amshir, ta ashi. Dr. Khriesilie Sachü, Nodal Officer, School Health Programme (SHP), Department of Health & Family Welfare, Nagaland ajanga iba sentong indang rateta jembiba mapang, Health Programming atema iba yagi tongti shilem agir aser school level nunga tajungba nung angazüker, ta ashi. Dr. Khriesilie-isa ashiba agi, kaketshir ka takum piyong atema yimya tajung angazükba nung school-i tongti shilem agir, anungji Ministry of Health & Family Welfare and Ministry of Human Resource & Development, GoI ajanga schoo; mimh preventive aser promotive health education programme tem nungdak ta ajiteta maparen balala inyaker. Pai ashiba agi, school shia nungi tesayur ana-na "Health & Wellness Ambassadors" ama training agitsü aser parnoki kaketshir dang health & wellness education sayutsü. Iba sülen kaketshirtem ya lokti nung health & wellness osangbener ka ama parnok aliba tesem nung temang anema alitsü mapatem inyaka renlokdaaktsütsü. Iba orientation sentong tenzüka nung Kenilo Semp, Sr. Lecturer DIET menden liasü aser Visedeü Solo, Lecturer DIET ajanga tepela ankep o jembiba liasü. Anogo pezü agitsü aliba iba sentong ya March 20, 2021 nü tembangtsü aser iba sentong ya Department of Health & Family Welfare aser Department of School Education, Nagaland lungjemer ayongzüka lir, kong Sony Katiry, Lecturer, DIET Pütsero, Phek; Dr. Anile Puro, Sr. Lecturer, DIET Pütsero, Phek; Visede-ü Solo, Lecturer, DIET, Chiechama, Kohima aser Kenilo Semp, Senior Lecturer, DIET, Chiechama, Kohima nungertem ya shisalen sayur asütsü aser SCERT nungia mentor ana alitsü. AYUSHMAN Bharat-School Health & Wellness Programme ya phase wise yimya nung Kohima, Kiphire aser Peren district tem atema mezüing tenzüük aser tanungba district tem nunga agiyonga aotsü.

ADDRESSING NUTRITIONAL CHALLENGES THROUGH FOOD FORESTRY

Real time monitoring of provisional supplementary nutrition for improving nutritional status of pregnant women, lactating mothers and children (0-6 years) for prompt supervisions & management of services. **POSHAN TRACKER**

Create awareness about traditional nutritious food to tackle malnutrition & develop nutritional security through nutritional **POSHAN PANCHAYAT** garden.

Map crops and food-grains grown in different regions of the country to tackle malnutrition by promoting local food that are rich in protein. Highlight economic benefits of investing in nutrition and promote propagation of regional cropping patterns. **POSHAN Atlas**

Propagation and plantation of nutritional Medicinal Plants & Trees. **Mission KALPATURA**

POSHAN PAKHWADA

16-31 March 2021

Issued in public interest by:
State Project Management Unit
POSHAN ABHIYAAN, Nagaland, Kohima



Manipur Police-i Yairipok post office tesem nung mozü shibelener tetsür ana apuba sülen agiba noksa angur. Police-i tena ket nungi opium seret 5 aser tanga osettem angu. Tenaji Sagolshem Subadhani Devi (50) aser Sagolshem Mema Devi (48) na ta jangjaogo aser Narcotic Drugs and Psychotropic Substances (NDPS) Act kübok ken o ka benokogo. (Imphal, March 16)

CBI-i Army ketdangsür 17 dak tai tongloktsü; Guwahati, Jorhat dena tesem 30 mita ao

Guwahati, March 16 (Agencies): Armed forces nung nisung shimokba maparen nung tim masüba mapa inyakba atema CBI-i Army ketdangsür 17 anema ken o benokogo.

Tai tongloktsürtem rongnung Lieutenant Colonel jenjang nung ketdangsür pungu dena lir.

Criminal Bureau of Investigation (CBI)-i Hombarnü linük kübok tesem 30 mita ao.

CBI-i tai tongloktsüba Army ketdangsürtem rongnung Service Selection Centre, Kapurthala nungi Lt Col Surender Singh; Army Air Defence Corps nungi Lt Col MVSNA Bhagwan aser 6 Mountain Division Ordnance Unit, Bareilly nungi Lt Col YS Chauhan nunger dena lir.

Tanüngba ketdangsürtemji Lt Col Sukhdev Arora, Joint Director, DG Recruiting, New Delhi; Lt Col Vinay, Group

Testing Officer (GTO), Selection Centre South, Bengaluru, aser Major Bhavesh Kumar, GTO, Selection Centre North, Kapurthala nunger lir.

Iba mapa tasa atonga inyakbaji Lt Col MVSNA Bhagwan liasü ta tai tonglokja lir. CBI-isa Army ketdangsürtem aser parnok kinungertem dak tai tongloktsüogo.

Yimti aser jila 13 nung aser Base Hospital, Cantonment, tanga Army establishments nung CBI-i mita ao.

Hombarnü CBI-i Kapurthala, Bathinda, Delhi, Kaithal, Palwal, Lucknow, Bareilly, Gorakhpur, Visakhapatnam, Jaipur, Guwahati, Jorhat aser Chirangon nung tesem balala mita senzü.

Iba mapang parnoki taitüsü aketba kulikaket aika ngutet aser itemji jungjunga

Assam Rifles DIG-i Aizawl nung orphanage semdang

Aizawl, March 16 (Agencies): Assam Rifles DIG Brigadier Digvijay Singh-i Aizawl nung aliba Thutak Nunpuitu Team (TNT) orphanage semdang.

Hombarnü Brigadier Digvijay Singh-i orphanage semdangdang Bengaluru nungi entrepreneurs & doctors Govindaraju, Dr Mahesh Reddy, Gururaj, Shivanna aser

Vikram Diganto nungertemi pa meina ao.

Iba orphanage nung matamabensartem dena tanur 500 shi lir.

Iba mapang tanurtem nem ration, clothing, school bags aser masks agütsü.

Assam Rifles-isa cake-cutting sentong ka agi aser ibaji tanurtem nem lema chidaktsü.

"Assam Rifles-i



Mongulbarnü Arunachal Pradesh Speaker Pasang D Sona aser State Minister Wangki Lowang nati Lamang semdangdang agiba noksa angur. India-China arrtsü nung Lamang ya Indian outpost tatembangba lir aser iba Shi-Yomi district nung lir. Speaker Sona aser Minister Lowang nati Indo-Tibetan Border Police (ITBP) jawan tem den sensaksemdang Army aser ITBP nem tenüngsang agütsü. (Lamang, March 16)

Candidate 28 indang nomination magizük

Guwahati, March 16 (Agencies): State Election Commission-i Assam Assembly election tanabuba shilem atema candidate 28 indang nomination magizük.

Assam nung April 1 nü polling tanabuba shilem agitsü aser iba atema candidate 408-i nomination asü.

"April 1 nü constituency 39 nung polling asütsü. Hombarnü nomination papers reprangba sülen candidate 408 nungi 28 indang magizük" ta Assam State Election Commission-i metetdaktüsü.

Candidate temi nomination asütsüba tatembangba anogoji March 17 nü lir.

Assam nung March 27 nü election mezüngbuba shilem agitsü. Iba atema constituency 47 nung candidate 267 lir.

March 27 nü polling nung CM Sarbananda Sonowal

(Majuli), Speaker Hitendra Nath Goswami (Jorhat), ministers Ranjit Dutta (Behali), Naba Kumar Doley (Jonai) and Sanjoy Kishan (Tinsukia), AGP minister Atul Bora (Bokakhat) aser AGP minister Keshab Mahanta (Kaliabor) nunger dena lir.

Mezüngbuba shilem nungsa Assam Congress president Ripun Bora (Gohpur), CLP leader Debabrata Saikia (Nazira), AICC secretary Bhupen Borah (Bihpuria) and former ministers Bharat Narah (Naoboicha), Pranatee Phukan (Naharkatiya), Rakibul Hussain (Samaguri) aser Bismita Gogoi (Khumtai) nunger dena lir.

Maneni, Assam Jatiya Parishad (AJP) president Lurinjyoti Gogoi (Duliajan & Naharkatia) aser Rajior Dal president Akhil Gogoi (Sibsagar) na dena lir.

BJP-i public rongsen yokdoker: Bhupesh

Dibrugarh, March 16 (Agencies): Bharatiya Janta Party (BJP)-i public rongsen yokdoka linük raksatsür ta Mongulbarnü Chhattisgarh Chief Minister aser Congress lennir Bhupesh Baghel-i ashi.

Namrup Gandhi field nung Congress candidate Pranati Phukan atema nüboyimba sentong ka nung o jembidang BJP sorkari nübortem madak tashiyim inyaker ta Bhupesh Baghel-i tai tongloktsü.

"BJP sorkar ali tashi public rongsen aser industry tem kümzüka mali. Parnoki Namrup Fertilizer 4th unit meyanglutet. BJP sorkari nija dang public rongsen yokdoker. BJP ya tiyazü nangzüka party ka lir. Parnoki tebang agibo inyaktsü ta nangzüker saka asangsang nungbo nübortem atema kecha meinyaktsür" ta Baghel-isa ashi.

"Nenoki Congress nem vote enoktsüra Namrup Fertilizer mesamatsü, mesüra nija teloktem dang yokdoktsü" ta paisa shisem.

Sarbananda Sonowal-i aniba BJP sorkari tesüiba küm pungu tsüngda nangzükbatem meinyaktet. Parnoki süngolu nung inyaker taa Rs 351 kümtsütsü ta ashi saka meinyaktsü. Tawa tu parnoki Rs 217 kümtsüogo saka tanü tashi mapa inyakertemi iba senji mangur. BJP-i taila tenangzükbatem dang agir saka onokibo nangzüka ama inyaker" ta Baghel-isa metetdaktüsü.

Assam nung onoki sorkari kümra Rahul Gandhi-i Assam nung rally ka nung '5' Guarantees' nangzüka inyaktsütsü, ta paisa ashi.

Naharkatia constituency nung BJP, Assam Jatiya Parishad (AJP) aser Congress tsüngda tokteper.



Union Home Minister Amit Shah-i Assam nung lungkak aitba anenba indang jembiba Baghel-isa aitsü.

"Assam nung BVFCL Namrup 4th unit mangu tashi lungkak aitba manentsü. BJP ya Assam maitüsü, sobaliba aser putiotsü atema lendong lir. Parnoki sorkar kümra CAA (Citizenship Amendment Act) benoktsü. Assam nung onok nem sorkar kümdaktsüra CAA agientsü" ta Baghel-i metetdaktüsü.

Iba sentong nung Kaliabor MP Gaurav Gogoi-ia Chief Minister Sarbananda Sonowal-i Assam nung "commissioning Raj" inyaker ta tai tongloktsü.

"Jatiya Nayak-i ajak nungi commission agir. Assam nung BJP sorkar kübok kechisarena nung jenjang atur. Assam nung Chief minister tashimaittibaji Sarbananda Sonowal lir kechiyong pai süngolu nung mapa inyaker nem Rs 351 agütsütsü nangzüka magütsü" ta Gaurav Gogoi-isa ashi.

"Congress sorkar alidang nübortemi ajak angu saka tangbo kechisarena nung jenjang atuba ajanga nübortem timtemer. Congress-i taila tenangzükbatem masü saka '5 Guarantees' adokogo. Onoki aniba teloktepi sorkar kümra, lanur lakh 5 nem mapa agütsütsü" ta Gogoi-isa metetdaktüsü.



TIR YIMYIM

YIMOBILEM (EDITORIAL)

DIMAPUR RASEMNÜ, METSÜREMI (MARCH) 17, 2021

GARI LENDONG AJURUBA

Tangar limatem nung ama asen lima nunga gari teimba teimba akümer aser nisungtema mazüngba mazüngba akümer, saka lenmangbo tamajungba tamajungba akümer, iba jagi gari melamelaa raksar aser gari yunglushiba nung sen aser mapang endokbajibo yutsür gari lendong ajurupet ajuruba osang angashir. Aji oda, yashia Longleng nungi Dimapuri aruba 'Blue Hill' pur indang aonung senzüba bus ka lendong ajuruba osangji tejashitsüka lir. Atangji, gari lendongji kodang kong komaser ajurutsüar memetet, saka lenmang tajung nung gari tajung tanishir tajungi anira, ajurutsü aliba lendongtem nungia aiben paidoka jenbutettsü. Asenok asoshi shisabolutsü kaji, Nagaland nung senzüba garitem ya teimbaka kanga tejen aser gari kaketa shitak mali ta senzür. Ibayongji, gari kaketa shitak melira Assam majangi odi ta asenoki jembir. Tetezü, Nagaland nungbo gari tejen ser kaketa shitak maliyonga, kecha tarendaktsü mali, sademsadema senzütettsü. Iba yimya aser tangatetbaji asenoki asenoksasa tangsa melentsüla. Talisa, nübortem senzüba bus aser taxi gari-tem yabo mapang shia gari shitak anepalu asür asü masür aser kaketa shitak ali mali, itemji mita reprangtsüla aser gari tejen ser junga anepalu mesütetba garitembo mesenzüdaktsütsüla. Aiben asen lima nung senzüba bus garitem ya tejen ser menden nunga temang alenloker amentsü belt-a mali ser gari telong nung dena osettsüset bener jajaba angur. Lenmang ajungyonga asen lima yabo tenem aser lenmang nung lenku tali, anungji gari anishirtemia kanga kümdanga anitsüla aser tamenertema kanga kümdanga amentsüla. Tanga lima nungbo bus driver aser conductor-tem ya uniform temerük tajung agir, gari nung amenertema mulung anisüngzükdakja temulung lemtetlemteta lenmang piyong tadongtsü ka matong tashi anir aoer. Ano, gari anishisang den pa den yaritepertem dang masü saka gari nung amener ajakji gari menden nung alenloka aliba belt agi, gari nung mener aodang temang mashimashi marakzütsü aser gari atashiyonga tamenertembo menden nungi metsüki menden nungji zep ta shitak mentettsü atema pei pei menden nung alenlokaktsür. Ibaji gari apusoa maodang gari nung ketdangsertemi tamener shia dang shia pei pei menden nung belt alenloka alibaji agidaktsür külenang apusoa aotsü. Aji oda, toudak nunga lenmang nung police-temi itemji repranger. Aji oda, kodang gari nung aodang belt agi menden nung alenloker odir, gari lendong ajurua gariji tsüokyonga meyrui kümzüksü lenmang lir. Atangji, asenoki asenoksasa aiben gari nung aodang asen taküm kümzüksü asoshi renema yutsüba inyakyimtem nungji manidaki zübazübaa bilema mener oli aruli jajar. Iba jagi gari lendong atalokyonga asenokbo lendong nungi kümzüksüba ser nung gari lendongbo tulukabo masü saka asenokbo kanga mejungi yirur aser asü amaa ajurur. Item ama lendongji asenoki matalokdangbo kodanga mataloktsü ama zübazübaa bilemer saka atalokerbo kodanga shilanga marutsüsa tesasatsü tulu akümer. Aji oda, asenokbo gari tajung nung mendena tajung nung mener belt dena zep ta alenloker amentsü melen gari telong nung dena merang oset aser gas cylinder dena enoka bener jajar. Itemjibo asenoki asen atembangtsü atema sang soa ayuba amato asütsü. Itemji bener jaadang ajungbena ka gari lendong tilaka ajuru nunga telong nung bena aliba merang osettem jagi onsetsa asütsü. Joko, asenoka tangar inyaksangshi aser awashi terabo meteta aiener asünungji, tang nungibo government nung tereprangtsü purtemi nübortem senzüba bus aser taxi garitem menden nung belt tashi shitak ali mali repranga gari senzüdaktsütsüba kanga tongtibang kümogo. Iba ama teinyaktsü purtemi dang masü saka gari kiburtemia dena gari nung senzütsü purtem asoshi bilemja anepalura, iba jagi meteta aser memeteti nisung taküm aika kümzüksü aser gari jungjunga renemer senzüba jagi asen lima dena mera akettsü.

OLEMSABANG

TEMO AKETBA NORTHEAST INDIA ALIMA WARASÜLEN ALA-ASHI KOKTETTSÜYIM

S. Temjen Imchen

(Yashi adok nungi...)

Laishibaren nungi Tetuyuba kar

Ochishiba aser yimjung indang Lai o nung aser laiputi (theology of justice and peace) ajaklen aser teti nung nungdak. Item Laishiba tesayubatemji tanga mapa dak balaka tanü Covid-19 tensa nung kanga nungdaka kümogo. Lemang item nungi reprangdangdi:

(i) **Ala-ashi tia nung ochi phuoküm (in defense of the poor/poverty)**

Ochishiba indang tanü lokti putu tensa nung jembidi süra, Laishiba nung ainkartemi shina yutsüba nung ajemdaker asenoki bilemdangtsü koka lir. Amos, Isaia aser Yeremia ainkartemi Israel nungeri Tsüngrem dang tashi mangaba indang anema jembimeso. Item Tsüngrem O tongdartemi tashi-makar atema nungdak aser parnoki ochi o jembidi. Amosji Yihuda linük (alulanglen aliba yimli) nungi Israel (temaba yimli) limai atua pai ainkar mapa inyak. Pa tesayuba aika rongnung tongtibangtibaji ochi indang sayutsüngibaji liasü. 8th century BCE tendak Israel yimliji yimji-yimjung aser rongsenren kanga junga akümba mapang ka liasü. Idangji takartemi – chubar jamirtemi – maka maitertem dang kanga mejungi benshi. Iba ochimashi mapatem anema Amos ainkari apuso aser ala-ashir atema pukhüma jembidi aser nokdak.

Amos-i linük nübur rongsen madak ochimashi mapa inyakba ngua takartem anema shin o jembidi. Tamangba yimsü maparen ajak tema tereprangtsü asoshi dang liasü, aser nüburtem kümzüka alitsü teimlajia kangabo maliasü. Amosi temulung raksa aser tasü ita nüburtem dang Tsüngremi kintemji merenshitsu ta osang sangoktsü. Pai ochiba “ayong ama yima aludakjang” ta ashi. Kechiaser paisa ashi “ashiko Kibuba Temeranger Tsüngremi, Yosef tanüngba dang aochitsüa kar” (5.15).

(ii) **Loktilibaren ochishi mapaji Tsüngremi meteta lir (Amos 2:6-8)**

Amosi Israel kin aser lokti temenen anema jembidi. Pai joko nübur dang yamai sangdong:

Yamai Kibubai ashir, “Israeli özüng raksaba asem asoshi, oda pezü asoshi, ni iba temerenshi magientsü; kechiaser parnoki temeshipur taribi yong ayok, aser tsüngsem jura ka yong maka maiter ayoker.

Oda ali telungi ia sensaker kolak manung ajemshir, aser ajemalur lenmang nungtokadoker; aser kü temeshi tenüng menendaktsütsü asoshi tebu aser jabaso aiür kasa dangi air;

Baser tenangzüka nung agiba süoshi manung tekülemdak shia anasa parnok sasa ontaka alir, aser Tsüngrem kidang parnoki sen chizükba yi ajemer (Amos 2:6-8)

Iba tetezü, takartemi nisung taküm shishilemba. Ibaji ochimashi aser tim masüba mapa inyakba asütsü. Sensakerji tetsüng nung semokba chapall ka ama amshi. Alar kümdaktsü. Sensakerbo ali nung aowi ama dang ajemshi. Amitsür dang taochi mesayu. Bendanger, aener aser lajar dang temeim mesayu. Israel puri parnok tezüngzüktepba pur ta asübato amadok. Iba yongji, ainkar Amos kanga jashi aser pai Yehovah Tsüngrem o-bendang parnok dangi arutsü ta shin.

(iii) **Ochishir sempaba**

Amos 5:10 nung yamai ashir: “Süngkhüm nung arütsüba nisung dang parnoki sempar, aser atangji jembiba dang parnoki sempar.” Amos-i pa ainkar ola sashi-sashia jembidi aser ibaji ochimashirtem arimeso (5:10-13). Agüja aliba Laiji reprangdangra, Israel puri shibaisa ochi-o jembidiri, paji sempa. Amosi ashir, ochibaji Tsüngrem dak nungi tenzüker (5:7, 15, 24:6:12). Saka, taküm tilar kaja Kibubai odang metoktsür ta ashir. Anungji Tenüngsang Ken zülur-i tamanger dang yamai ashir: “Kibubai tongmelanger awabanga ayur. Ni tajemzük kümdakja liasü, aser pai ni kümzük” (T.Ken 116:6). Iba tetezü, Kibubai aochir aser atangji Pai inyaktsü.

(iv) **Ochi ajanga Yimjung (Isa 32:17)**

Isaia ainkar – 8th century BCE – par nüburtem dang ochi aser yimjung indang sayua liasü. “Aser temeshiba mapa nungi adokbaji tesünep alitsü, aser ochiba nungi adokbaji teti asoshi ajemajema aliba aser tamang katetba alitsü” (Is 32:17). Iba Lai tekong jagi ochiba dangi tuyur. Kongsa ochiba mekalir, idakji yimjung makatsü. Ochimashi aser yimjung tenaji kodanga meputetettsü. Kasa mesükba nung, Amos-ia yamai shina yutsü, “Saka tzü ama ochiba nunga aludakjang, aser ayong ama temeshiba moshia yimdakjang” (Amos 5:24). Iba Lai tekong teratetbaji yamai angatettsü akoker.

Loktiliba kobai sentep nung atentsü jangrar, saka Tsüngrem asoshibo temulung maten, ibaji ashirepa aotsü aser iba nung temaitso kaji tekubokba jenjang nung alir dang ochimashi inyakbaji asütsü.

(v) **Mapa meranga inyaktsü nungdak**

Covid-19 tensa sülenbo bendang lima nungi shilanger asüyonga, pei jaka/tesem nungdang alir asüyonga, nisung shia agi putu tensa amato masü, saka kanga meranga inyaktsüla. Apijemtsü Shin nung yamai asenok meimchir ajungmesor: “Oh azümesen, na meja dangi oang. La yimya bilemdangang aser shisa ka-ang” (6:6). Tang temelenshiba tensa nungbo, joko nisung shinga pei kidang moka mekazütsüla. Ajaki pei-pe akok mapa meranga inyaktsü tim. Mejai tanen maka meranga inyakba ama, asenok meimchiribo iba shiruru tilaba den tuluba aser tajungba inyaktettsü. Aji koda tajung!

O-tembang:

Iba lima nung meimchir shingaia coronavirus koma arutsü aser koda kangshitsu meteta maliasü. Nüburtem okrongba, leman aisü nung takoksa, aser tasüba jenti adokdaktsüba asadangtsü mokokla! Anosa, iba wara jagi asenok meimchir shirangdaktsüdagi. Shirangshiko aser timtem jenti, iba wara yagi ala-ashi adokdaktsür; takar-sensaker lemdangtsü; mapa makai kümdaktsü; yimti aser jila shipangtsü; aenlen sensüsempongtsü nokdangtsü; aser tasütsü mapang kechi koda asütsü meshiteti kümdaktsü; ano aika lir.

Süra, asenoki kechi inyaktsüla? Tang kechi inyaktsü aji inyatsüla. Tat. agi, bangdak alirtem tashi angatsüla, medical sciencei kechi ashir, ibaji kümdanga tashi anga anidaktsüla. Iba den külemi, kija aser kibong, lokti taküm ajak nung iba wara aser ano tasenba wara (mutant variety) nungi jenbua alitsü mezüngbuba asenok teinyaktsü südi. Kümzüka alitsüji na aser ni dak aket. Na aser ni iba wara nungi kümzüka lira, asüngji asenok meiyong!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogotemi kasa o kasa na kibong akümertem memoatsütsü



March 14, 2021 nü St. Peter's Square, Vatican City nung Khristantem tekülem sentong nung adenba noksa nung angur.

Rome, March 16 (Agencies): March 15, 2021 nü Vatican-i, putirtemi kasa o kasa (tetsür o tetsür na aser tebur o tebur na kibong akümba) kibong akümertem memoatsütsü, ta metetdaksü. Arogoi kasa o kasa kibong akümertem akhümtsübutsi, ajisüaka iba ama kibong akümbaji majungshitsü, ta metetdaksü. Pastor tem aser Arogotemi kasa o kasa na kibong akümertem agizüksü aser züngoksü atema asündangba langzüdang Vatical doctrinal watchdog- Congregation for the Doctrine-i item telangzüba agüja liasü. Tamalen Pope-i putirtem

dang kasa o kasa shi nung medemertemi pei taküm nung Tsüngremi melungba angatetsü atema parnok yaritsü asoshi projects aser proposals renemang ta metetdakja liasü. Official süa agizükra putirtemi kasa shi o shi nung medemertem-a moatsütsü. Congregation for the Doctrine nung prefect, Luis F. Ladaria-i, iba telemtetba ya kasa o kasa kibong akümertem anema obendang agütsüba masü saka kiyimba koda temeshi, ibaji nenshia metetdaksütsü atema lir, ta ashi. United States nungbo Catholic Khristan 10 shia nungi 6-ibo kasa o kasa na kibong akümba pusemer (2019 Pew

survey), anungji Hombarnü Vatican sangdong ajanga aika mepelar. New Ways Ministry nung executive director, Francis DeBernardo-i küm aika kasa o kasa na kibong akümertem pusema arur, aser pai ashiba agi, Arogotem nung putirtemi kasa o kasa na kibong akümertem moaja aruogo. Hombarnü Vatican-i sangdong ka ajanga, Catholic tesayuba nung, tetsür ka o tebur ka na kibong akümtsüji Tsüngrem sentong lir, anungji kasa o kasa na kibong akümbaji Tsüngrem sentong masü, anungji Arogoi parnok moatsütsü makok, ta metetdaksü.

Assam Christian Forum-i secularism atema vote agüjang ta mepishi

March 16, 2021: Ecumenical Khristan telok kati taruba Assam assembly election nung secularism atema vote agüjang ta mepishia metetdaksü; iba tetezü Hindu pusemba party (BJP) nem vote tagütsü, ta mepishiba lir. Assam nung Khristan denomination balala ajak densema aliba organisation- Assam Christian Forum-i sangdong nungji yimtenren party tenüng kecha tetshia mali, ajisüaka tamangba yimsü ajak sadoka amangtsü atema secular party nüngdak, ta metetdaksü. Centre nung dang masü saka Assam nunga tang Hindu pusemba Bharatiya Janata Party (BJP) sorkar lir, aser parnoki India linük ya Hindu linük kümdaksütsü nükjidong nung inyakba Hindu nationalism pusemer, ta aikati tai tongloksür. Taruba Assam election nung Congress leniba nung yimtenren party 8-i akümba Mahajot teloktep anema BJP-i tokteptsü. Assembly menden 126 atema Assam nung March 27, 2021 nungi tenzüka shilem asem küma lemsar election

agitsü aser May 2 nü election osang sangdongtsü. Guwahati nung Catholic tongti putir, John Moolachira-i aniba Assam Christian Forum-i, Forum-i linük temzüng nung alibatem atema nokdaker, ta metetdaksü. Sorkari linük temzüng nung aliba ama secular aser democratic republic ajungkettsütsüla, ta shia Forum-i, "Iba tetezü, linük temzüng nung aliba ama tamangba yimsü ajaka sadoka amangtetsüla; tekülem agiba aser tekülem kitem kümzüka ayutsüla aser minority telok balala tekülem agibaji akhümtsübutsi, ta metetdaksü. Muslim nunger aser Khristantem densema minorities purtem nem yimsüsüba aser ketdangsubaren nung kasa maongka agütsütsüla, ta Forum-i ashi. Parnokisa, state nung tamangba yimsü balala amanger ajak, tangatetba balala, sobaliba aser kin ajak akhümкета litettsü aser sadoksadoka litettsüsa sorkari inyaksüla, ta ashi. March 14 nü osangbener den jembidang Forum nung

otongdar, Allen Brooks-i, election jakdang Arogo tentetemi state nung election tesünep nung junga agitettsü atema ayongzüker, ta ashi. "Tang onoki nübur ajak dendaksüba sorkar aser secular sorkar ka shimtsü atema ayongzüker, kechiyong linük tesem ajungalen minorities-i parnok amokmeren tia nung lir amai bilemer," ta Allen Brooks-i metetdaksü. "Asenoki shimba sorkari taruba küm 5 tashi asenok madak yimsüsütsü. Anungji nisung ajaki iba maongka agia tamangba yimsü temeden aser secular akhümtsübuba sorkar ka shimtsü atema vote agütsütsüla," ta Brooks-i metetdaksü. Assam nung nütsüng million 33 nungi Khristan nütsüngbo million 1.1 shi dang lir, aser akhidang nungi state nung Khristantem timbakati Congress pusemer. Assam nung Bodo, Karbi aser Garo nunger den tea estates nung tribal nütsüng aika aliba constituency 40 shi nung Khristantem votes ji kanga tongtibang. State nung nütsüng shilem 61.47 shi Hindu nunger lir aser nütsüng shilem 34.22 shi Muslim nunger lir.

ANOGO ABEN TSÜNGREM DEN

SHIA ARUBA AGI TASÜBA JENJANG ANGATET

"Kechiyong Yisu taküm onok tasütsüba shih nung jungkai adoktetsü asoshi onok shir taküm lir, Yisu atema tasüba nem teti bendanga agüja lir." (II Kor. 4:11) Asen kümtetdakba Yisu Khrista shia aruba nung temelenshi tulutibaji nütsüngtem taküm nung jungkai adoka liasü. Yisu kangki nung tepsettsü mapangbo parnok taküm samatsü asoshi kanga tsübu aser jenshia liasü. Parnoki Yisu rishikangshia anir senzü dang ojita nungi dang repranga liasü; shiangai Yisu kangki dena melenzüktsüa na nung maliasü. Peteribo Yisu asemben tashi menanzükteti aküm. Saka kodang Yisu shia aru Yisu nütsüngtem taküm nung temelenshi tulu adok. Parnok dak tasü tait tanela poktet, marendaki Yisu shia aruba indang kuli asü, aser tepela agi asüng. Shia aruba temelenshi kechisa angur? Parnok taküm samatsü aser bendanga agütsütsü metsübui aküm. Kechiyong Khrista asoshi parnok taküm samabaji tajangzük ta angatet. Tasübaji tatem ama mibilem, saka Khrista asoshi bendanga agütsübaji langkoshishi agi kangki nung südaktsü, Mathi noklangnok agi lepsetdaktsü, Philip tongshi tulu ka nung meta südaktsü, Barthloloma taküm dang taküp asa, Yihuda lasang agi kaset. Yisu shia aruba kuli agi pei taküm Khrista atema samatsü metsübui akümer. Naia ne taküm nung pa shia aruba kuli tajangja kar ma? **SARASADEM** Temeim Yisu na shia aruba ajanga ni Khrista nung asüba jenjang tali junga angatetogo. Ni na asoshi kü taküm bendanga agütsür. Amen

Kenya linük nung Khristantemi süngko ajanga timtem ajurudar

Nairobi (Kenya), March 16 (Agencies): Kenya north tsütsü süngko jenti aruba sülen Khristantem meyrjang aikati timtem ajurudar, ta Aid workers-i metetdaksü. January ita tatembanglen nungi tenzüka alu aruhtsü mapang nung süngko jenti aruba sülen alu nung tsük, aonsotsü, kiset shiruru chiyungtsü aser shiruru chiyimdak tesem ajak nung timtem agüja süngkoi chireptsüdar. "2020 küm nunga süngkoi alu nung takoksa tulu bener aruja liasü," ta Khristan Aid telok-Barnabas Fund-i metetdaksü. Tang Barnabas Fund-i süngko ajanga timtem ajurur Khristan kibongtem nem teyari agütsü tenzükogo; Khristan kibongtem rongnung Mount Kenya kübok Mbeere aser Embu na kija nunga kibong 1,000 shi densema lir. Barnabas Fund-i, "Alu nung aonsotsü tekarakba nung asentenshia züsentettsü aser kiset shiruru jenti azükarudaksütsü nükjidong nung onoki aluyimertem yarir. Onoki metsüh aser fertilizers agütsüba den külemi alu nung süngko entzü südaktsütsü atema pesticides mozü tapet agütsüdar," ta metetdaksü. Barnabas Fund aser Kenyan project partners longjemer timtemba kibongtem nem chiyungtsü agütsür; parnoki kanga sabua achiba "getheri" chiyungtsü yanglutsü atema parnok nem mendi, beans aser menjang agütsür, ta Barnabas Fund-isa metetdaksü. "Iba ya ajanga aluyimertem taruba alu aruhba mongpu -August ita tashi taküm litettsü. Iba dak alia Christian aid workers-i tiyongtsü nung inyakertem ket nungi aluyimertem kümzüksü atema aluyimertemi aonsotsü rizüngba nung yaritsü aser tajangzük keta yokdaksütsü atema tebilemba lir," ta Barnabas Fund-i metetdaksü. "Onoki aluyimertem nem tzünglu maruyonga masüba süngjangljang süngdong tatemtsü agütsütsü. Item süngdong ajanga alu nung ali temo akettsü. Mbeere aser Embu nung aluyimertem asoshi süngdong anepalubayim training agütsütsü," ta parnokisa metetdaksü. Kenya nung coronavirus ajanga mapa manguba timtem, ozüng alema inyakba mapatem kanga bulua atalokba aser sensak tia aliba mapang ka nung tang chiyungtsü agi anüngba wara agi nisung jenti kongshiogo. Kenya nung mapang shia tzünglu mapang talanglang maruba agi nisung jenti timtemer, iba denji külemi Somalia nung amenoka aliba Islamic kiralongrar telok Al-Shabab-i Kenya nung Khristantem nem mapang shia timtem agütsüdar.

Olong 20 shi nung March 19, 2021 tashi nung iba telangzüba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.

Bank nung inyakertem tejangraba kümzüka toktsütsü: Finance minister



New Delhi, Metsüremi/ March 16 (Agencies): Public sector bank tem privatize sütsüba dak sendakba nung opposition aser bank union temi sorkar aitsüba teyalong nung Union finance minister Nirmala Sitharaman-i Mongolbarnü, privatize sütsüba bank tem nung inyakertem tejangraba kümzüka toktsütsü, ta ashi

Cabinet-i telemtetba agiba sülen osangbenertem den sensaksemba mapang Union minister-i, "institutions tem shibangtsü mesüra mapa inyakertem agintsü masü ta jangjashitsüner. Mapa inyakertem itasen mesera scale mesera pension ajak anepalutsütsü," ta ashi.

Bank ajakbo privatize masütsü ta shia finance minister-isa, "onoki Public Enterprise Policy ka sangdongogo aser public sector-i shilem agitsüba tesem 4 jangjaogo. Iba nung financial sector densema lir. Ajisüaka bank ajak privatize masütsü," ta ashi.

Public sector banks ana privatize sütsüba dak sendakba nung bank union temi linük ajunga nung anogo ana longkak aitsü atema ayongzüker aliba mapang Sitharaman-i iba olen lemsatepa liasü.

State-i achaayangba bank tem state ajak nung Hombarnü nungi longkak aitdar aser iba ajanga mapa nung tetsükdaktsü adokogo, kechiyong bank nung

inyaker lakh 10 dak tema iba longkak aitba sentong nung shilem agidar.

Maneni bank tem inyakyim dak sendakba nung Sitharaman-i, public sector nung bank ishikabo lir ajisüaka tejakdangi renloka aoba bank asenoki nüngdaker ta ashi.

Taoba küm sorkari PSU bank 10 tongtiba bank 4 den lokteptsüba indang bilemtetshia lai, "linük tenüngdakba piridaktsütsü atema State Bank of India (SBI) amala bank tali nüngdaker," ta ashi.

Sitharaman-i ashiba agi, privatize asütsü imlaba bank tem ya privatize asüba sülena maneni inyaksangshitsü.

Minister-isa, Congress lenir Rahul Gandhi-i tweet ka ajanga sorkar aija "privatising profit" aser "nationalising loss" ta ashiba aitsüogo.

Iba dak sendakba nung lai, "bank nung takoksa ya UPA sorkar mapang atalok. UPA yimsüsüba mapang kibong ka ajungkettsü atema ochimashi Nationalize asüba aser saru agütsürtem sen privatize süa liasü," ta ashi.

PM principal adviser, Sinha mapa nungi anen

New Delhi, Metsüremi/ March 16 (Agencies): Ato Kilonser principal adviser, PK Sinha-i Hombarnü pa mapa toktsüogo. Pa indang office ajanga Sinha-i pa mapa nungi anentsü asoshi temelaba meshia shiti züluba jangjatsüogo, ajisüaka pai mapa toktsüba kuli tejangja osang agütsüba mapang tashi nung mejangjai liasü.

"Pai pa mapa March 15 nü toktsüogo," ta ketdangsür tejen kati ashi.

Ano tanga ketdangsür kati ashiba agi, Sinha temang manemba ajanga mapa toktsü. "Pa timtem kar lir aser iba amala khuret tulu aliba mapa nungi pilaa ali tajungba asütsü ta bilema mapa toktsü. Sinha ya tatishitsü aketba officer ka shibai mapa kanga jeta inyaker," ta ketdangsüri ashi.

PMO nung temaba jenjang nung aliba ketdangsürtem meleshiba mapang tang Sinha mapa nungi anenogo. Taoba küm April ita Tarun Bajaj economic affairs secretary ama North block nung aden. Iba sülen pa nem revenue ministry incharge agütsü. Ano ketdangser tejen AK Sharma shiba Ato Kilonser den Gujarat nung 2001 küm nungi inyaka aru, pa ministry of micro, small

and medium enterprises-i yok aser iba sülen January ita pa voluntary retirement agi. Mapa nungi anenba ketdangsür Bhaskar Khulbe aser Amarjeet Sinha na Ato Kilonser adviser asütsü shimogo.

"PMO nung tongtibanng temelenshi kar bener arua lenir tasen aioktsü imlar," ta tanga ketdangsür kati ashi.

Sinha ya taoba Uttar Pradesh cadre 1977 batch Indian Administrative Service (IAS) officer ka liasü. Narendra Modi-i aniba sorkar mezüngbuba tenure nung pa Ajit Seth melena cabinet secretary aküm. Iba masüadang pa ministry of power and shipping nung secretary liasü. 2019 küm pa mapa nungi anenba sülen pa atema Officer on Special Duty ta nüngja agütsür Prime Minister's office (PMO) nung mapa balaka tenzüktü .

PMO nungi Nripendra Misra tuguba sülen Sinha principal adviser asütsü shim. September 2019 order nung Sinha-i, ministry, department, agencie aser lokti ajak policy ken o tem achaayangtsü ta shia lir.

Ajisüaka osang agütsüba mapang tashi nung sorkari Sinha mapa toktsüba osang tejangja magütsü liasü.



Mongolbarnü Mumbai kübok Vikhroli tesem nung Air Force indang bus ka tsükoka nisung pongu tashi yiruogo, ta police ketdangsür kati metetdaktsü. Gari nung timtem kar adokba ajanga gari anisangi ajungbena brake apuba sülen gari tsükok, ta kasa sangdong ajanga metetdaktsü.

BJP-i nüburtem ola temseptsütsü: Mamata

Mekia, Metsüremi/March 16 (Agencies): Centre aija West Bengal Chief Minister Mamata Banerjee-i Mongolbarnü, Bharatiya Janata Party (BJP)-i tasa tamajung yangludar aser parnoki sorkar kümtetra nüburtem ola temseptsütsü, ta ashi.

Mejia nung wheelchair nung mener lokti senden ka nung ojembiba mapang Banerjee-i, "election mapang BJP puri parnok senden nung adentsü atema sen agi nüburtem alizüker, kechiyong parnok pusemertem mali," ta ashi.

Tetsüng yirur liaka la dak raratsü tanüla aliba sayua lai, "ni maneni raratsü aser BJP-i March 27 nü asayatsüsa akümtsü," ta ashi.

Yirur aliba keyi tetsü ka den la ateshia Banerjee-i, "yirur aliba keyi tetsü dak lendong

taketba. Ni tetsüng ka agi dang asayatsü aser jalatem aser tetsütemi tetsüng ana agi ni yaritsü," ta ashi.

Laisa, "BJP-i ni komaka reshikangshiaka ni hau ta mali," ta ashi

Home Minster Amit Shah aija Banerjee-i, "ni amokmerena parnoki ni menokdangtetsü. Parnoki tasa tamajung ka asadar kong parnoki CBI aser ED yoktsü," ta ashi.

Maneni lai ashiba agi, BJP lenir Amit Shah-i Election Commission azüoker aser pai poll panel nem tetuyuba agütsür, ta ashi.

Laisa nüburtemi TMC atema vote agüja yimjung nung mang ayangtsü, ta ashi.

Sentong nung Banerjee-i "Harey Krishna Harey Harey TMC ghorey ghorey," ta yimyim ayima liasü.

Gujarat kübok yimti 4 nung aonung curfew benokogo

Ahmedabad, Metsüremi/ March 16 (Agencies): Coronavirus asendenshir prokshia aoba nokdangtsü atema Gujarat kübok yimti pezü nung aonung curfew benoka aliba ghonda ana talila bendenloker ita tatem tashi atsülangtsüogo. Sorkar sangdong ka ajanga ashiba agi, curfew ya maneni Ahmedabad, Surat, Vadodara aser Rajkot yimti nung March 17 nungi March 31 tashi aonung 10 nungi anepdang 6 ako tashi benoktsü. Item yimti tem nung March 15 tashi aonung 12 nungi anepdang 6 ako tashi curfew benoker liasü.

Sorkarisa, yimti pezü nung March 16 nü tashi aonung 12 nungi anepdang 6 tashi curfew benoktsü ta metetdaktsüogo.


Chief minister Vijay Rupani lenisüba kübok state coronavirus task force core committee senden ka amenba mapang curfew benoktsü atema telemtetba agia liasü. "Coronavirus tashidak menar tali küma aoba apir State sorkari aonung 10 nungi anepdang 6 ako tashi curfew benoktsü telemtetba agiogo," ta sorkar sangdong ajanga metetdaktsü.

Ozüng tasenba kübok shishilembadak, chijemdak, dokan, mall, showroom tem ajak 10 ako nung shibangtsü. Diwali sülen item yimtitem nung Covid tashidak menar aika akümba sülen taoba küm November ita nungi tenzüka tang tashi nung curfew

trokbenbuba benoker.

Hombarnü Ahmedabad Municipal Corporation-i yimti kübok kiyong ti nung chijemdak, restaurant aser mall tem 10 ako nung shibangtsü tetuyuba agütsüogo. Jodhpur, Navrangpura, Bodakdev, Gota, Paldi, Thaltej, Maninagar, aser Ghatlodia kiyongtem nung iba tetuyuba benoka inyaktsü.

Yimti tongtibanngtem rongnung Surat nung Covid-19 agi shiranger timba potetogo aser iba yimti sülen Ahmedabad, Vadodara aser Rajkot lir. Gujarat nung Hombarnü nisung 890 dak tashidak poteta tashidak menar 279,097 jungogo. Tang tashi nung shiranga alir anepertem 269,955 lir aser tashidak agi asür 4,425 jungogo.



New Delhi, March 16: Ato Kilonser Narendra Modi aser Finnish Ato Kilonser Sanna Marin na Mongolbarnü virtual summit ka akaba mapang tangokba noksa nung angur. Senden nung Marin-i India nung Covid-19 tashidak atema vaccine agütsüba sentong tajung benoka inyakba atema tenüngsang agüja liasü.



Yemen south tsütsü rongnendak yimti, Aden indang Crater district kübok al-Maashiq Palace nung linük balalai agizüka aliba Yemen sorkar indang headquarters kima longkak aiterem adenshia aliba noksa nung angur. Sorkari junga ketdang mesütetba tejashi nung nüburttem March 16, 2021 nü iba tesem nung adenshia tir aliba ki telungi aitsü meranga liasü.

Myanmar nung asür kinungertemi asüpila sentong agi

Yangon, Metsüremi/March 16 (Agencies): Myanmar nung mitkartemi yimsü asüba anema longkak aitba mapang tepsetba nisung ter dak tema kinungertemi Mongulbarnü asüpila sentong agi aser security forces temi security forces ashiba manga aser nisung ka khaset.

Myanmar nung mitkartemi February 1 nü Aung San Suu Kyi'er sorkar atsüngdokba mechi yimtenren tsütsü rongrongshirong tulu adoka aliba tetetzü makamaiter aya agi meneptsü, kechiaser linük tesem ajungalen chiyongsü aser totzü nung jenjang atur, ta UN food agency ajanga tekumdangsü ashi.

Hombarnü security forces temi nisung 20 shi khaset, aser aji masüdanga Deobarnü nisung 74 tashi tepseter liasü, aser item ya aika Yangon nung liasü, kong China-i senotsü agütsüba factory tem nung mi senlokja liasü, ta Assistance Association for Political Prisoners (AAPP) ajanga ashi.

Yangon nung Mongulbarnü asüpila sentong 31 agia liasü, ta mangyimer kati ashi.

Deobarnü Yangon nung tepsetba medical student Khant Nyar Hein asüpila sentong nung lanur mangyimer noklang aika adenshia liasü.

Security forces temi nisung tasü mang rakzük saka maneni asüpila sentong agitsü, ta asür

kinunger kari osangbener dang ashi.

Hopta ishika longkak aita aruba mapang security forces temi nisung 184 shi tepsetogo, ta AAPP ajanga ashi, aser Mongulbarnüa Kawlin jila nung longkak aiter ka khaseta liasü.

Mongulbarnü Dawei jila nung nisung telok tilaka longkak aitba mapang Suu Kyi indang noksa amer liasü aser mitkartemi tashiyim amshiba anentsü takhangba agütsü. Yangji azüdokshiba osang mali.

Azüdokshi tali akumba ajanga U.N. Secretary-General Antonio Guterres süng mang aser linük balala dang tashiyim amshia nübür azüoktsü merangba tembanba nung yaritsü ajungshi.

Lanka Govt-i Burqa asema nokdangtsü aritepa telemtetba magitsü



Keheliya Rambukwella

Colombo, Metsüremi/March 16 (Agenceis): Burqa asema nokdangtsü atema Sri Lanka sorkari aritepa minyaksü aser ajaki mulungtepba sülenang telemtetba ka agitsü, ta minister kati Mongolbarnü ashi.

Sri Lanka dangi Pakistan envoy Saad Khattak-i sorkari burqa asemstsü tenokdangba agütsütsü telemtetba agiba aitsüba sülen anogo ka lir Cabinet otongdari iba olen lemsatep. Saad-i, iba jenjang agiba ajanga Muslim nunger

yirutsüba dang masü saka human rights nung aibeletsü ta ashi.

Sri Lanka Cabinet-i Hombarnü senden nung iba ken o benoka sensak masem. "Ajaki mulungtepba sülenang benoka inyaksü," ta Cabinet otongdar aser minister Keheliya Rambukwella-i Mongolbarnü osangbenertem dang ashi.

Pai ashiba agi, sorkari tejak nembangba dak sendakba nung inyakyim aritepa minyaksü. National security dak sendakba nung itangitertemi tensa asadangba sülenang telemtetba agitsü, ta minister-i ashi.

Public Security minister Sarath Weerasekera-i, hopta tatemi pai Niqab nokdangtsü atema benokba Cabinet paper ka nung pai sign süogo, ta ashi. Iba onük ya Hombarnü cabinet senden nung benoka sensak asemstsü imlaa liasü.

Weerasekera-i, burqa asema ya national security atema lendong lir, ta ashi. UN Human Rights Council session mena aliba ajanga sorkari telemtetba magi-i atar asü, ta

asüngdangba mapang Rambukwella masü ta langzük.

Sri Lanka-i tang Geneva nung mena aliba UN Human Rights Council session nung Organisation of Islamic Countries (OIC) teyari meshidar. SL nung 2019 küm local Islamist extremist telok National Thawheed Jamaat (NTJ)-i Easter Sunday anogo tekülemdak asem aser hotel aika nung bomb pokdakja nisung 270 tepsetba sülen burqa asema khen atema nokdanga liasü. SL sorkarisa taoba küm COVID-19 tashidak agi asürtem rongtoktsü atema tetuyuba agütsü, koba Islam aser Christian tamangba yimsü nung keta mali.

Pakistan densema alima kin balalai aitsüba sülen iba tetuyuba taoba ita agin. Pakistan Ato Kilonser Imran Khan-ia taoba ita Colombo semdangba mapang iba ken o benoka jembiogo.

Sri Lanka kong Buddhists nunger shilem 70 lir iba linük nung Muslim nunger shilem 9 lir. Kasa mapang nung Hindu nunger shilem 12 aser Christian shilem 7 dak tema lir.

University bus ka amak; nisung ana asü

Kabul, Metsüremi/March 16 (Agencies): Afghanistan anüdoктиplen Mongolabarnü university staff mena aliba bus ka amak, aser gari anisang den kaketshir ka tepset, ta ketdangset kati ashi. Sorkar aser Taliban na tsüngda yimjung asoshi sensaksem bangdaker aliba mapang civilian tem tali maka arudar.

Baghlan province nung iba bus amakba sülen university lecturer-a nisung trok yirua liasü, ta interior ministry otongdar Sayed Hamid Rushan-i ashi.

Ministry-i iba bus amakba Taliban dak tai tongloksüogo, ajisüaka Taliba-i iba ken o nung parnok densema mali ta shigogo.

"Iba bus amaka nung onok mujahideen densema mali, onoki iba tatalokba aitsür aser tsükchirtemi onok anema tasa tamajung asaba ama agir," ta Taliban otongdar Zabihullah Mujahid-i ashi.

Kasa mapang nung

mejangjaba nisungtem Heart tesem nung tzünokdang ka nüka aliba security forces tem amak aser nisung asem tashi khasetba den ka yiruja liasü, ta iba province nungi ketdangser kati metetdaksü. Ano security forces pezü tashi samara bushidar, ta kasa sangdong ajanga metetdaksü.

Ita tsüngda sorkar tenzükertem, osangbenertem, academics aser rights workers tem amakba ajanga ketdangsertem tebilemtsü akar.

Human Rights Watch (HRW)-ia Mongolbarnü lokti nung nübu agi ajema aliba teloktem, tetsür aser osangbenertem amakba aitsüogo.

"Mejangjaba nisungtemi osangbener, civil society activists, aser professionals tem dena maka aika tepsetba den karbo linük nungi mintokogo aser iba ajanga tanungba nüburttem tetsübu nung dang alir," ta HRW nung Asia director Patricia Gossman-i ashi.



Milan nung aliba drive-through site ka nung March 15, 2021 nü tetsür ka AstraZeneca mozü agiba noksa nung angur. Temang nung timtem agütsütsü tetsübu agi Italy nung COVID-19 mozü, AstraZeneca amshiba anena lir.

Mijang atoba lendong nung nisung 7 asü

Quetta, Metsüremi/March 16 (Agencies): Pakistan southwestern tsütsü Balochistan province nung mijang atodak methane gas nungi mi adokba sülen tango mesashiteti mijan ator pongu aser tekümzüker ana asü, ta ketdangsürtemi ashi.

Iba region nung hopta ka tsüngta ibai mijang atodak lendong tanabuba ataloker alitsü.

Provincial capital, Quetta nungi anüolen tsütsü mile 105 shi orr Harnai district kübok Tor Ghar tesem nung mijang atodak iba mi lendong ya Hombar aonung menur atalok, ta sorkar ketdangsür Sohail Anwer Hashmi-i ashi.

"Mi agi kaksaja aliba tapok atangtsü atema mijang atortem mijang atoba telungi ai, saka parnok iba methane gas tamajung ajanga tango mesashiteti kuma asü," ta Hashim-i osangbener dang telephone ajanga ashi.

"Mijang atortem ya ali telungi feet 1,400 tarok lur inyakba mapang lendong ya atalok," ta pai ashi.

Aonung rescue operation agiba mapang mijang ator tasü mang tenet ya nguteta liasü, ta Hashmi-isa ashi.

Balochistan nung anogo ishika tsüngta mijang atodak ibai lendong tanabuba liasü, kechiaser Brehostibarnüa

Marwar coalfield nung methane gas poka mijang ator nisung trok süa liasü.

Ita pezü tejakdang Harnai nung aliba mijang atoba tesem ka poksa yangjia mijang ator nisung pezü asü.

2020 küm Balochistan nung lendong 72 tashi ataloka mijang ator 99 asü, ta sorkari ashir.

"Tia maka item mijang atortem ya ajungben lendong ajurudang mera agitsü tesayuba agüja mali aser parnok ket kumzüktsü hadir mali," ta Hashmi-i ashi.

Training peria magütsüba ajanga lendong ya atalok, ta provincial mines department nung chief inspector Shafqat Fayaz-ia ashi.

"Mijang ator nisung pongu ya mijang atoba telungi ai saka mopung aoba tesem lapoktsü amadok, koba methane gas agi sünger liasü. Mapang tatsüka lir tekumzüker nisung ana telung nung aliba mijang atortem kumzüktsü merangba mapang asü," ta pai ashi.

Balochistan ya Pakistan indang region tulutiba saka nütstung yongsük tajemtiba ka lir, kong mijang, natural gas, copper, sulphur aser danga ali rongsen agi peria lir.

Aji süaka iba province ya healthcare, education aser nüburttem ajangzükba maparen tsütsü linük nung teküpoktiba jenjang nung lir.

CHILDLINE Dimapur küm 10 jungogo



Dimapur, Metsüremi/March 16, 2021 (TYO): CHILDLINE Dimapur tenzüker küm 10 ajungba anogomung nüngtem nung, Sunep Lemtur-i mejema aser atenba "Moi Ke Hunibi" music video ken ka Mongolbarnü (16.03.2021) DC Conference Hall Dimapur nung sayaogo.

Iba music video ya Shri Nukshimatong, EAC Dimapur-i saya liasü. Nübur dang tekümdangtsü osang sangoktsütsü asoshi sentong balala ayongba den mapa ajanga lokti nung tanurtemi timtem balala ajuruba asadanga teyari agüja aser nungita aruba atema pai CHILDLINE Dimapur dang pelaba metetdaksü.

Tarutsü anogotem nunga, CHILDLINE Dimapur indang maparen balala nung District Administration-i maneni nungita yaritsü, ta pai ashi.

Kasa sentong nung, Nodal Director CHILDLINE, Subonenba Longkumer-ia

jembia liasü. Tanurtem taküm aser parnok tarutsü tajungba asoshi tayongzükbata/timtem jenti liaka tejangraba tanela tulu yur bendanga agüja inyakba atema pai CHILDLINE team nem tenüsang agütsü.

Pai, JJAAct indang mapatong tasen dak sendakba nung sentong nung adenertem aser team ajungshia liasü. Iba den külemi, CHILDLINE Dimapur tenzüker küm 10 tashi nung tongtibang maparen balala achaayanga inyaka aruba aser ajangzükbatem indang pai metetdaksü aser CHILDLINE wadang tsütsü inyakyim ajunga nung metitemi nungita aruba asoshi Deputy Commissioner lenisüba kübok District

Administration, külem teloktep telok balala, department aser külem sendaktepa alir ajak dang pai alakteta pelaba shisem.

Iba anogomung sentong nung, Open Shelter CECS Dimapur nung tanurtemi ken ka aten. K.Ela, Collab Director CHILDLINE Dimapur-i tepela anküp o jembi. Timtem balala nung tanurtem kümzüka aser parnok ajangzükdaksütsü mechi maneni meranga inyakba asoshi lai CHILDLINE Team dang pelaba metetdaksü; aser iba sentong takok ngua agitetsüsa amalitepa inyakba asoshi sentong nung adener ajak dang lai pelaba shisem, ta sangdong ka ajanga metetdaksü.

THINENER

150th Sesquicentennial Benjongmung 2022 tenüng nung adokba Raffle Draw koba 25th December 2020 nung sayatsü liasü, ibai COVID-19 tashidak wara mechi mepaidoktetba timtem kar ajurua anogo thinena 14th May 2021 nung sayatsü sentong lir, ta metetdaksü. Metokmeperi atema sasaa bilemer.

Sd/-

Molungkimong Planning Cum-Fund-Raising Committee

GOVERNEMENT OF NAGALAND DIRECTORATE OF TECHNICAL EDUCATION NAGALAND: KOHIMA

NO.DTE/ESTT-2/5/2016-17

Dated, Kohima the 16th March 2021.

NOTIFICATION

Applications are invited from the interested In-Service candidates with eligibility criteria laid down below for admission to Degree Module course at North Eastern Regional Institute of Science & Technology (NERIST), Itanagar.

Sno.	Particular	Requirements
1	Branch/ Field	Electrical Engineering
2	Duration	3 years course
3	Minimum Qualification	3 years Diploma with minimum 60%pass percentage from the institute recognized/Approved by AICTE.
4	Maximum age	40 years as on 1 st August 2021. PH and Women 43 years as on 1 st August 2021.
5	Certificate of Undertakings	From the concerned Department that the candidate shall be sponsored for 3 years.

Selection shall be done purely on the basis of academic performance. Last date of submission of application along with all documents to the Directorate of Technical Education is on or before 15th April 2021.

Issued by DIPR

(Er.Vipulhou Houngu)
Joint Director.

GOVERNEMENT OF NAGALAND DIRECTORATE OF HEALTH AND FAMILY WELFARE NAGALAND: KOHIMA

NO.DHFW-5/23/Trg/NSG/2017/2018

Dated Kma. the ...Mar. 2021.

NOTIFICATION

In continuation to this Directorate Notification No. DHFW-5/23/Trg-NSG/2017/2018 Dt. 11th March 2021 the list of placement order for undergoing GNM/ANM training can be downloaded from the Department website www.nagahealth.nagaland.govt.in and DHFW office Notice Board. Individual copy can be obtained from this Directorate.

Change of Institution will not be entertained once the placement order is out.

Sd/-(DR. KEVICHUSA MEDIKHRU)
Principal Director

Dte. of Health and Family Welfare
Nagaland: Kohima.

Issued by DIPR

MULUNGNNEN O

Onok asür Limainla (Mangimen, Karbi-Anglong, Assam) kinungertemi la ajungbena iba lima nungi pilar onok mangyim jashi tia nung alidang, temeimer shirnokisa nübo, rongsen aser sarasadem agi onok dang meima yariogo, nenok ajak dang kanga pelaba metetdaksü.

Talisa, la temang kanga majung kümer mozü kidang anepaluba mapang nungi la mang agi ki tongtsüba tashi nung kanga aria bilema yaritepertem kar dang pelaba yangi shisemer :

1. Changlang Town Arunachal Pradesh nungi Doctors, Nurses aser tembartem.
2. Naga Christian Fellowship, Dibrugarh, Assam.
3. Dibrugarh Medical College nung inyakertem aser kija kibong ajak.

Onoki nenok dang kanga pelar aser Tsüngremi nenok temeim mapa asoshi talubosa moajangma ta onoki sarasademtsür.

- Temeim Chirnur aser Kinungertem.



ADVERTISEMENT

Post : Hotel Manager
1 No. at Mokokchung Town
Qualification : Degree in Hotel Management
Experience : 1 to 5 Years
Age : 24 to 40 Years
Salary : 18000 plus Free fooding & accommodation
Interested candidates may send their application along with CV & contact details on or before 25th March 2021 to the following address.
1. iti.mokokchung@gmail.com
2. Whatsapp: 7005643192

NEW SHOWUBA & KHEHOKHU AO BAPTIST FELLOWSHIP DIMAPUR : NAGALAND PELABA LEMSATEPER

New Showuba Ao Fellowship construction Committee ajanga Tsüngrem nem tenüsang agütsür kija, kibong, kiyonger aser lokti balala kuikati nübo, rongsen aser tamang sarasadem agi sentep ki yangludang yaritepogo, nenok ajak dang kanga pelaba lemsateper.

Asen teyanglur Tsüngremi nenok mapa tajung maneni moajangma ta ozü tamang sarasadem.

DECLARATION

Regd.No: 89/2021

Date: 15/3/2021

I, Shri BENDANGTOSHI AIER son of Late. Er. T. Saku Aier, R/o Boro Lingri, Karbi Anglong Assam, do hereby solemnly affirm on oath as follows:

1. That, I am a citizen of India and an indigenous inhabitant of Nagaland.
2. That, on 13.01.2015 my late father had executed an affidavit bearing Reg. No-186/2015, whereby it is specifically mentioned that I was gifted two immovable properties situated at Duncan Bosti and 4th Mile Diphupar, Dimapur.
3. That, the other properties of my late father were gifted to my younger brother.
4. That, I have no right whatsoever on any of my late father property which are in Dimapur and Lakhuni Village except for the properties that was gifted to me.
5. That, this affidavit is made to declare that I have no right/ inheritance or right to act on my behalf or anyone on any of the properties of my late father except on the properties that was gifted to me.
6. That the declaration, made above are true and correct to the best of my knowledge and nothing have been concealed therein.

Declarant

Solemnly sworn before me on this the 15th day of March 2021 at Dimapur.

Notary Public, Nagaland

DECLARATION

We the family members of Late. Er. T. Saku Aier after through deliberation have unanimously decided to disown Mr. BENDANGTOSHI AIER, Son of Late. Er. T. Saku Aier for bringing embarrassment/shame and ruining the good name of the family by his action/activity. He is debarred from all the possessions, rights, privileges of the family and any individuals/ groups dealing with him are doing so at their own risk.

Date: 15.03.2021

Sd/- YANGER AIER
(On Behalf of Late. Er. T. Saku family)

MOKOKCHUNG INTER-WARD FOOTBALL TOURNAMENT

Mongsenbai o Penli na semifinal-i igo



Mokokchung, Metsüremi/March 16, 2021: Penli Ward o Majakong Ward na tsüingda tang tesaidak Mokokchung Inter-ward football tournament quarter final match asayaba mapang tangokba noksa nung angur. Mokokchung, March 16, 2021 (Noksa Agir: Imnawabang Jamir)

Mokokchung, Metsüremi/ March 16, 2021 (TYO): March 16 nü yangi Imkongmeren Sports Complex nung Mokokchung Inter-Ward Football Tournament mezüing quarter final match Mongsenbai Ward o Süngkomen Ward na asayaba Mongsenbai Ward-i goal 6-0 agi Süngkomen madak takok tulu ngua semifinal asayatsü jenjang ajangzüktetogo.

Tanabuba asaya Penli Ward o Majakong Ward na asayaba Penli Ward-i goal 2-0 agi koka parnoka semifinal asayatsü temsüogo.

Tanü mezüing match Mongsenbai o Süngkomen na asayaba, Mongsenbai goal 6 agütsüba Jersey No. 14 - Shiponglepba, J/No. 7 - Imnatoshi aser J/No. 16 - Toshinungsang par aseme goal anana (2 each) agütsü. Süngkomen pur nem goal küptokdaksütsü khenyongi maongka magütsüi asaya rangben Mongsenbai-i azüoka liasü.

Tanabuba asaya Penli o Majakong na asayadang mezüing asaya tesadang tashi nung shingaia goal kata magütsüteti atem. Tanabuba

asaya tesadang nunga telok anaprongi goal agütsütsü kanga meranga asaya liasü saka tesü asaya tembangtsü minute ishika anünga lia Penli nungi Jersey No. 16 - Osa Chang aser J/No. 15 - Takomeren nati mapang tatsüka tsüingda nung goal kaka atongaatonga metsüoktsü.

March 17 nü nikong 1:00 ako nungi tenzüka tasembuba quarter final match Tongdentsuyong Ward o defending champion Arkong Ward na asayatsü aser pezübuba quarter final match nikong 2:30 nungi Artang Ward o Alempang Ward tsüingda asayatsü.

India vs England: Tanüingba T20Is terepranger medeni asayatsü

Ahmedabad, Metsüremi/ March 16, 2021 (Agencies): Nüburtem tsüingda COVID-19 wara menashia aoba timba akümba asadangteta, India aser England na tsüingda tanüingba T20 Internationals asem ya terepranger medeni asayatsü, ta Hombar nü Gujarat Cricket Association vice-president Dhanraj Nathwani-i ashi.

"March 16, 18 aser 20 nü Ahmedabad kübok Narendra Modi Stadium nung tanüingba T20s asaya ajak atema terepranger memelatsü. Asaya asem atema shirnoki ticket aliogo parnok ajak nem ticket sen meyiptsutsü," ta sangdong ka ajanga Nathwani-i metetdaksü.

"Corona tashidak menatepba timba küma aoba ajanga, BCCI den jembitepba sülen Ahmedabad nung India aser England na tsüingda tanüingba T20s asaya asempronlga terepranger marudaksüi asayatsü asoshi onoki GCA nung telemtetba agiogo," ta sangdong nung shia lir.

Nathwani-i ashiba agi, tanüingba T20Is asaya asem atema shirnokisa ticket aliadokogo, parnok nem ticket aliba sen meyiptsutsü asoshi GCA-i asalentong ka yanglutsü.

"Shirnoki complimentary ticket nguogo, parnok dang stadium-i marutsü asoshi mepishir," ta pai shisem.

Iba osang sangdongba sülen, BCCI aser England and Wales

Cricket Board (ECB) napronglai parnok tebilemba lemsatepogo.

"Coronavirus wara prokba azüoktsü asoshi BCCI-i tsüzüing ozüing tem nung maneni anidaksü aser iba tesashi wara nungi fans aser külem sendaktepa alirtem tamasa kümzüka ayutsü asoshi meratem agia inyaksü," ta BCCI secretary Jay Shah-i ashi.

"Onok ajak pei pei telok indang bio bubble nung munga iba asayamung nung shilem agir aser asayar shingaia terepranger ka den danga majurutepe; aser iba den külemi asaya mapang batsman temi stand (terepranger amendak) tonga ball zükloksüra idangjisa ball ji sanitize süadoker asünung telok ola mangashiba dak alaka, terepranger madenba ajanga asaya nung timtem kecha madokdaksütsü," ta ECB-i shisem.

Alima nung Cricket stadium tulutiba kübok T20Is series asaya pungo nungi mezüing asaya ana tashi nung terepranger 60,000 dak tema aruagi asaya reprangogo aser tang ama Covid-19 wara junga süshia maoba mapang ka nung terepranger jenti adenshia asaya reprangdaksütsü sentong lemtetba nung tebilemtsü adoka tasüandangba balala aruogo.

Taküm India nung Test series lapokba asaya atema terepranger nokdanga arur sülen tanüingba series asaya nungi international cricket asayatem nung terepranger melaa liasü.

Road Safety World Series T20: SA Legends semi final-i iogo

Raipur, Metsüremi/March 16, 2021 (Agencies): Road Safety World Series T20 asayamung nung South Africa Legends-i wicket 10 agi Bangladesh Legends tsükdakja semi-final tongtetogo.

South Africa Legends nungi opener Andrew Puttick (ball 54 nungi run 84 not out; 9x4, 1x6) aser Morne van Wyk (ball 62 nungi run 69 not out; 9x4) nati junga asaya half century yangluba ajanga team takok angu.

Hombar aonung iba asaya mapang, Bangladesh Legends-i run 161 target yutsü, saka South Africa Legends-i over 19.2 nung batsman ka danga out mesüi iba alizüing tongtet.

Iba takok ajanga South Africa Legends pur point 16 ngua jenjang tasembuba tongtetogo. Road Safety World Series T20 point table nung India (20 points) aser Sri Lanka (20 points) na mezüingbuba aser tanabuba nung alitsü; aser team ana sülen, South Africa Legends tasembuba lir.

Toss koka Bangladesh Legends batsman tem South Africa Legends bowler temi out mesütsüadang, parnoki taoba asaya dang nungi kanga agi tajungba shilem agia tenzü.

Mohammed Rafique-i aniba

Bangladesh teloki over 20 nung run 160 yanglu aser wicket 9 out süadok. Iba asaya nung South Africa Legends off spinner Thandi Tshabalala aser fast bowler Makhaya Ntini nati wicket anana agi.

Opener Nazimuddin-i 4' pungo aser 6' ka densema ball 32 nung run 33 yanglutet. Külem team pur Aftab Ahmed (39; 1x4, 3x6) aser Hannan Sarkar (36; 2x4, 1x6) napronglai shilem tajung agia Bangladesh atema run bendenlokja asaya.

Ajisüaka, Nazimuddin ya Tshabalala-i out sütsü. Iba sülen, Ahmed o Sarkar na Zander de Bruyn aser fast bowler Garnett Kruger nati out sütsü.

Team pur run 130 tashi yanglur Sarkar out asüba mapang, run 30 nung Bangladesh asayar trokbo tukadoker liasü.

Team ana tsüingda score tem yamai alitsü:

Bangladesh Legends: 160/9 in 20 overs (Nazimuddin 32, Aftab Ahmed 39, Hannan Sarkar 36; Makhaya Ntini 2/26, Thandi Tshabalala 2/33).

South Africa Legends: over 19.2 nung run 161/0 (Andrew Puttick 84 not out, Morne van Wyk 69 not out); South Africa team-i wicket 10 agi takok angu.

Billie Jean King Cup World Group Play-offs nung Sania asayatsü

New Delhi, Metsüremi/ March 16, 2021 (Agencies): India indang tetsür kija asayar takoktet Ankita Raina aser asayar tejen Sania Mirza nati anir India-i taruba ita Latvia team den Billie Jean King Cup World Group Play-offs away tie nung shilem agitsü terenemba lir. Mongolbarnü AITA-i iba asayamung atema züingsem pungo team sangdongogo.

Anogo ana 'away tie' asayamung ya April 16, 2021 nungi National Tennis Centre, Lielupe, Jurmala indang indoor hard court nung asayatsü.

Team rongnung tena den Karman Kaur Thandi, asayar tasen Zeel Desai aser Rutuja Bhosale nung dena lir.

Mongolbarnü virtual senden ka agiba sülen, All India Tennis Association (AITA) Selection Committee-i team ya shim.

Riya Bhatia, shiba taoba küm züingsem ka ama asaya liasü, team indang 'reserve player' ama la team nung denogo, kong Vishal Uppal captain alitsü.

Riya (rank 359) melen Zeel (rank 614) aniokba indang asüingdangba mapang, selection committee otongdar kati, iba telemtetba magidang asayartem



indang result asadangshia liasü, ta ashi.

"India nung Ankita sülen Riya Bhatia tanabuba jenjang nung liaka, Zeel indang result ajungba den ang junga asaya aruba ajanga la team nung shimok. Iba den külemi, tang atema dang masü, saka tarutsü asoshi lenmang tajungba lapoka aotsü nükjidong nung onoki iba telemtetba ya agi," ta Committee sangdong ajanga metetdaksü.

Taoba küm (2020) March ita

Dubai kübok ayonga asayaba Asia/Oceania Group I tie nung India team tanabuba jenjang nung tembangba sülen World Group Play-offs atema India qualify asüba ya tang mezüing alitsü. Iba asayamung nung Latvia team-i 2-3 agi USA makok.

"Iba Play-offs nung kodanga asayadanga mali asünung, tan mezüing qualify asüba ya team atema maongka tuluka lir," ta captain Vishal Uppal-i ashi.

"Iba Play offs tie kokra, onok atema iba ya tajangshiba tuluka asütsü. Takok angutsü asoshi meranga asayatsü dak alaka tanga lenmang balaka mali aser iba temulungtetba jagi India nung tetsür tennis asayartem tali dang ajungkettsütsü," ta Uppal-i ashi.

Iba asayamung indang World Group Play-offs, koba dang mezüingbo Fed Cup ta amshi, alima ajunga asüingba coronavirus wara ajanga iba Play offs anaben tashi anogo atsülangja liasü.

BILEMDANGANG

"Pei tia dak dang rangloker aliba taküm jagi tangar memeneper."